

- प्रधानमंत्री नरेन्द्र मोदी देश बणावण रा काम मांय कौशल री भूमिका ने खास बतायी- नज़ैजवानां सारु 62 हजार करोड़ रुपया ऊं बत्ता खर्च री न्यारी-न्यारी पहलां री सरुआत कीनी।
- चिकित्सा अर स्वास्थ्य मंत्री गजेन्द्र सिंह खींवर कह्यो-डेक्सट्रोमेथॉर्फन सिरप रा सगळा 6 नमूना जांच मांय सही मिल्या।
- केन्द्र सरकार हाइवे माथे टोल वसूली रा नियमां मांय बदलाव कीनो- नकद चुकारो करण परां दुगुणी रकम देवणी व्हेला।
- मौसम विभाग आवता दो दिन मांय जयपुर, जोधपुर, बीकानेर अर उदयपुर संभाग मांय केई ठोड़ां ज़ोरदार मेह रा आसार जताया।

000

प्रधानमंत्री नरेन्द्र मोदी कह्यो है के देश बणावण मांय कौशल रो घणो खास काम है। वे आज नौजवानां सारु 62 हजार करोड़ रुपया ऊं बत्ता खर्च वाळी न्यारी-न्यारी पहलां री आज सरुआत कीनी। ई मौके प्रधानमंत्री कह्यो के वां री सरकार कौशल अर नवाचार माथे खास ध्यान देता थकां भविष्य मांय नौजवानां ने अगुवाई करण सारु तैयार कर रही है। प्रधानमंत्री नई दिल्ली मांय राख्यी ज्या कौशल दीक्षांत समारोह मांय औद्योगिक प्रशिक्षण संस्थानां- आई.टी.आई. रे मार्फत प्रधानमंत्री कौशल अर रोजगार परिवर्तन-पीएम-सेतु री सरुआत कीनी। ई मौके श्री मोदी कह्यो के भारत ज्ञान अर कौशल रो देश है अर बुद्धि री ताकत इण री सब ऊं मोटी ताकत है। वे आई.टी.आई. संस्थानां ने खुद रे पाण ऊबो भारत बणावण सारु खास बताया अर कह्यो के पीएम सेतु ऊं आं ने और बेहतर बनाया जावेला।

000

कार्यक्रम मांय केंद्रीय कौशल विकास अर उद्यमिता मंत्री जयंत चौधरी ई मौजूद हा।

000

चिकित्सा अर स्वास्थ्य मंत्री गजेन्द्र सिंह खींवर कह्यो है के मुख्यमंत्री निःशुल्क दवा योजना रा तैत पूर्ति करीजी खांसी रोकण री पीवण री दवाई रा छह नमूनां री जांच रपट मांय सगळा नमूना मानक गुणवत्ता रा मिल्या है। वे आज जोधपुर मांय खबरनवीसां सागे बातचीत कर रह्या हा। मंत्री बतायो के भरतपुर अर सीकर समेत केई ठोड़ां ऊं दवाई डेक्सट्रोमेथॉर्फन सिरप काम लेवण ऊं उल्टी अर घबराहट व्हेवण सरीखी शिकायतां मिली ही, ज्यीं पाछे महकमो तुरत शिकायत वाळा बैच री दवाई काम लेवण माथे रोक लगा दीनी ही। मंत्री बतायो के एहतियातन ई दवाई री पूर्ति करण वाळी कंपनी कायसन फार्मा री सगळी 19 भांत री दवाइयां काम लेवण माथे आवता हुकम ताई रोक लगा दीरीजी है।

000

ई बीचे, सरकार दवाइयां मांय साल्ट री मात्रा रा मानक निर्धारण माथे असर डालण रा मामला मांय औषधि नियंत्रक राजाराम शर्मा ने मुअत्तल कर दीना है। राज्य सरकार केंद्र कानी ऊं दीरीजी राय ने ध्यान राखता थकां दो साल ऊं छोटा बच्चां ने आ दवाई नी देवण सारु कह्यो है।

0000

मुख्यमंत्री भजनलाल शर्मा रो काल रोड़वेज री 128 नुवी बसां ने हरी झंडी बता र रवाना करण रो कार्यक्रम है। मुख्यमंत्री रो ग्रामीण बस सेवा आपणी बस-राजस्थान रोड़वेज' री सरुआत करण रो ई कार्यक्रम है। ई रा तैत दूर-दराज रा गांवाई हलकां मांय ई डीलक्स

बसां चलायी जावेला। डीलक्स बसां मांय रेल अर हवाई जहाज री भांत सीट माथे ई खाण-पीण री सामग्री मंगायी जा सकेला।

0000

वित्त मंत्री निर्मला सीतारामन आज गुजरात रा गांधीनगर ऊं आखा देश मांय चलाया जावण वाळा अभियान आपकी पूंजी आपका अधिकार री सरुआत कीनी। ई अभियान रो मकसद लावारिस वित्तीय संपत्तियां रो बेगो निपटारो तैय करणो है। वे बतायो के तीन महीनां मांय ओ अभियान देश रा हर जिला मांय चलायो जावेला।

000

प्रधानमंत्री नरेन्द्र मोदी कानी ऊं ऐलाण करी ज्या अर लारला महीना री 22 तारीख ने सरु व्ह्या जीएसटी बचत उत्सव ऊं समाज रा सगळा तबकां ने फायदो मिल रह्यो है। सरकार ट्रकां अर वैन समेत वाणिज्यिक मालवाहक गाड़ियां माथे टैक्स री रेट कम कीनी है। नान्ही अर मझली परिवहन गाड़ियां माथे जीएसटी री रेट 28 ऊं घटा र 18 फीसदी कर दीनी है। ई कटौती ऊं ट्रकां रा दाम मांय कमी आवेला अर प्रति टन किलोमीटर माल ले जावण रो खर्च ई कम व्हेला। जीएसटी सुधारां ऊं खेती-बाड़ी ऊं जुड़्या सामान, सीमेंट, स्टील अर रोजीना काम आवण वाळी चीजां री आवाजाही सस्ती व्हेला।

000

सरकार राष्ट्रीय राजमार्ग शुल्क संग्रह नियम-2008 मांय बदलाव कीनो है। नुवा नियम रे मुजब वैध अर सक्रिय फास्टटैग रे बगैर टोल प्लाजा ऊं जावण वाळी गाड़ियां ने नकद चुकारो करण परां दुगुणी रकम देवणी व्हेला। यूपीआई रे मार्फत चुकारो करण परां सवा गुणी रकम देवणी व्हेला। अ नियम आवता महीना री 15 तारीख ऊं लागू व्हेला।

0000

‘विकसित भारत 2047’ रो सपनो सांचो करण सारू चलाया जा रह्या आत्मनिर्भर भारत संकल्प अभियान रा तैत प्रदेश मांय ई न्यारा-न्यारा कार्यक्रम राख्या जावेला। जयपुर री सांसद मंजू शर्मा आज जयपुर मांय खबरनवीसां सागे बातचीत करता थकां आ जाणकारी दीनी। वे बतायो के पंद्रह सितंबर ऊं सरु व्ह्या ई अभियान रा तैत पच्चीस दिसंबर ताई कारोबारी सम्मेलन, नौजवानां रा सम्मेलन, मशाल यात्रा, किसान मार्च अर महिला सूक्ष्म उद्यमी सम्मेलन सरीखा कार्यक्रम राख्या जा रह्या है। सांसद शर्मा कह्यो के ई अभियान रो मकसद देश रा हर रेहवासी ने माली तौर ऊं खुद रे पाण ऊबो करणो है। वे ई सारू देशी सामान ने बधावो देवण माथे जोर देता थकां सगळां ऊं देशी सामान री खरीदी री अपील कीनी।

000

नगरीय विकास अर स्वायत्त शासन राज्यमंत्री झाबर सिंह खर्वा अजमेर मांय अजमेर विकास प्राधिकरण रा दफतर अर शहरी सेवा शिविरां रो दौरा कीनो अर पट्टा दीना। ई मौके वे कह्यो के 17 अक्टूबर ताई मिलण वाळी सगळी अर्जियां रो नियम रे मुजब बेगो ई निपटारो कर्यो जावेला। भीलवाड़ा जिला रा संगरिया गांव मांय लगायी ज्या सेवा शिविर मांय एक किसान री जमाबंदी मांय नाम सही कराई ज्यो अर दूजा काम करी ज्या।

0000

मौसम विभाग आवता दो दिन मांय जयपुर, जोधपुर, बीकानेर अर उदयपुर संभाग मांय जोरदार बारिश व्हेवण रा आसार जताया है। महकमो ई दौरान तीस ऊं चालीस किलोमीटर प्रति घंटा रा जोर ऊं बायरो बाजण री संभावना जताई है। मौसम महकमो किसानां ने बारिश अर आंधी री शंका ने ध्यान राखता थकां साखां अर ढांडा री हिफाजत सारू जरूरी सावधानी राखण बाबत कह्यो है।

ई बीचे आज ई प्रदेश रा केई हककां मांय बिरखा रा समाचार है। सिरौही, राजसमंद, उदयपुर अर नागौर जिलां मांय केई ठोड़ां जोरदार बायरो बाजण सागे भारी बिरखा व्ही। सब ऊं बत्ती करीब 11 सेंटीमीटर बारिश सिरौही जिला रा पिंडवाड़ा मांय दर्ज करीजी।

00000

चिकित्सा अर स्वास्थ्य विभाग री ओर ऊं प्रदेश मांय 'शुद्ध आहार-मिलावट पर वार' अभियान चलायो जा रह्यो है। ई रा तैत ज़िलां मांय खाण-पीण री चीजां री जांच कर र नमूना लिया जा रह्या है। हनुमानगढ़ रा मुख्य चिकित्सा अर स्वास्थ्य अधिकारी डॉ. नवनीत शर्मा जनता ऊं खाण-पीण री गुणवत्ता वाळी सामग्री री ही खरीदी करण री अपील कीनी है।

000

उदयपुर मांय पुलिस ऑपरेशन क्लीन रा तैत आज 411 जणा ने गिरफ्तार कीना। ई सारू नौ सौ ऊं बत्ती ठोड़ां दबिश दीरीजी। अभियान रो मकसद वांछित आरोपितां ने पकड़ र आपराधिक वारदातां माथे काबू करणो है। आज गिरफ्तार करी ज्या लोगां मांय 5 स्थायी वारंटियां समेत हत्या री कोशिश अर लूट रा 98 वांछित अपराधी शामिल है।

0000

पशु कल्याण दिवस रे मौके आज जयपुर कने हिंगोनिया गौशाला मांय पशुपालन विभाग अर राज्य जीव-जंतु कल्याण बोर्ड री ओर ऊं राज्य स्तर रो कार्यक्रम राख्यी ज्यो। इण रो ई साल रो मुद्दो सेव एनिमल्स, सेव द प्लेनेट राख्यी ज्यो है। ई मौके जीव-जंतु कल्याण बोर्ड रा अध्यक्ष जसवंत सिंह बिश्नोई कह्यो के ढांढा-ढोर पारिस्थितिकी तंत्र रो हिस्सो व्हेवण सागे ई माली व्यवस्था मांय ई खास योगदान देवे है। वे जनता ऊं ढांढा-ढोरां रा प्रति करुणा अर संवेदनशीलता राखण री अपील कीनी। कार्यक्रम रे दौरान मौजूद लोगां ने पॉलीथिन काम नी लेवण री शपथ दिरायी ज्यी अर पौधा रोपी ज्या। ई बीचे वन्यजीव सप्ताह रा तैत पाली ज़िला री जोजावर रेंज मांय वन विभाग री ओर ऊं जाग जगावण अर श्रमदान रा कार्यक्रम राख्यी ज्यो। रेंजर विजेन्द्र सिंह डाबी री अगुवाई मांय जंगलात महकमा रा कर्मचारी सैर-सपाटा री ठौड़ भीलबेरी मार्ग री सफाई कीनी। बोगला री सरकारी स्कूल मांय जंगली जिनावरां री हिफाजत रा बारा मांय सवाल-जवाब री होड़ राख्यी ज्यी।

000